

খোতবা জুমআর সংক্ষিপ্তসার

সৈয়দনা হযরত আমীরুল মু'মিনীন খলীফাতুল মসীহ আল খামিস (আইঃ) কতৃক ৬ই ফেব্রুয়ারী ২০১৫
তারিখে লন্ডনের বাইতুল ফুতুহ মসজিদে প্রদত্ত জুমআর খোতবার সারাংশ

মু'মিনের কাজ হলো নিজেকে কাজে নিয়োজিত রাখা। এক লক্ষ্য অর্জনের পর দ্বিতীয় লক্ষ্য সন্ধান
সোচ্চার হয়ে যাওয়া। আর এটি-ই ব্যক্তিগত এবং সমষ্টিগত উন্নতির ব্যবস্থাপত্র এবং রহস্য। আল্লাহ
তা'লা আমাদেরকে এর তৌফিক দিন।

তাশাহুদ, তাউয, তাসমিয়া এবং সূরা ফাতিহা পাঠের পর হুযূর আনোয়ার (আই.) বলেন,

মানুষ হযরত মসীহ মওউদ (আ.)-এর পুস্তকাদি যে মনোভাব নিয়ে পাঠ করে থাকে সে অনুসারেই ইতিবাচক বা নেতিবাচক ফলাফল
প্রকাশ পায়। এ সম্পর্কে হযরত মুসলেহ মওউদ (রা.) একটি ঘটনা বর্ণনা করেন। তিনি বলেন, আমার একটি ঘটনা মনে পড়ে যা থেকে বুঝা
যায় ডিবেটিং সোসাইটি যে-ই বিতর্ক সভা করে এতে অনর্থক এক বক্তা একটা বিষয়ের পক্ষে বলে আর দ্বিতীয় বক্তা বিপক্ষে বলে থাকে। এর
ফলে অনেক সময় মানুষের চিন্তাধারা প্রভাবিত হয় কেননা, বক্তা যেই হোক না কেন সে কেবল বিতর্কের খাতিরেই কথা বলে থাকে, হৃদয়ে যা
আছে তা বলে না বরং সেখানে প্রতিযোগিতাই মুখ্য উদ্দেশ্য হয়ে থাকে। যাহোক, তিনি এ সম্পর্কে বলেন, এটি অনেক সময় ঈমানের জন্য
হানিকর হয়ে থাকে। তিনি আরো বলেন, মৌলভী মোহাম্মদ আহসান আমরোহী সাহেব (রা.) হযরত মসীহ মওউদ (আ.)-কে বলেছেন, মৌলভী
বশীর আহমদ সাহেব মসীহ মওউদ (আ.)-এর ঘোর সমর্থক ছিলেন আর আমি ছিলাম চরম বিরোধী। মৌলভী বশীর সাহেব সব সময় অন্যদের
বারাহীনে আহমদীয়া পাঠের উপদেশ দিতেন আর বলতেন, যিনি এই বই লিখেছেন তিনি মুজাদ্দিদ। তিনি বলেন, অবশেষে আমি তাকে বললাম,
চলুন তিনি মুজাদ্দিদ কি মুজাদ্দিদ নন এ বিষয়ে বিতর্ক করি। কিন্তু বিতর্ক কীভাবে হবে? আপনি যেহেতু তার সমর্থনকারী তাই আপনি বিরোধী
মনোভাব নিয়ে তাঁর বই-পুস্তক পাঠ করুন। আর আমি যেহেতু বিরোধী তাই আমি সমর্থকের দৃষ্টিভঙ্গি নিয়ে বই-পুস্তক পাঠ করব। আর এই
পুস্তক পাঠের জন্য সাত-আট দিন নির্ধারিত হয়। উভয়ে বই-পুস্তক পাঠ করেন। মৌলভী আহসান সাহেব বলেন, এর ফলাফল যা দাঁড়িয়েছে
তাহলো, আমি যে বিরোধী ছিলাম- আহমদী হয়ে যাই। আর যে আহমদীয়াতের খুবই নিকটে অবস্থান করছিল সে অনেক দূরে চলে যায়।
মৌলভী আহসান সাহেবের সামনে বিষয়টি সুস্পষ্ট হয়ে যায় আর বশীর সাহেবের হৃদয় থেকে ঈমান লোপ পেতে থাকে।

এ সম্পর্কে নিজের মতামত ব্যক্ত করতে গিয়ে হযরত মুসলেহ মওউদ (রা.) বলেন, মনস্তত্ত্ববিদ্যার দৃষ্টিকোণ থেকে ডিবেট বা বিতর্ক
অত্যন্ত ক্ষতিকর আর অনেক সময় তা ভয়াবহ ক্ষতির কারণ হয়ে থাকে। এগুলো এমন সূক্ষ্ম বিষয় যা বোঝার যোগ্যতা সকল শিক্ষকের নেই বা
সকল পাঠকের নেই। তাই ভাল কথা থেকেও কেউ যদি সমালোচনা বা আপত্তির দৃষ্টিকোণ থেকে কথা বের করার চেষ্টা করে তাহলে তা
স্বলনের কারণ হয়।

হযরত মসীহ মওউদ (আ.)-এর পুস্তকাদি সম্পর্কে অনেকেই আপত্তি করে থাকে; তারা বলে, আমরা পড়েছি এ কথা লেখা আছে, সে
কথা লেখা আছে। এর মূল কারণ হলো, আপত্তি করার উদ্দেশ্যেই তারা পড়ে। এছাড়া প্রসঙ্গও দেখে না যে, কোন প্রসঙ্গে কথা বলা হচ্ছে। তাই
এটি নতুন কোন বিষয় নয়। আপত্তিকারীরা আল্লাহ তা'লার কালাম বা কুরআনেও আপত্তিকর কথা খুঁজে বের করে। এ কারণেই পবিত্র কুরআন
সম্পর্কে আল্লাহ তা'লা নিজেই বলেছেন, এটি মু'মিনদের জন্য নিরাময় এবং রহমতের কারণ বা আশীর্বাদ। কিন্তু আপত্তিকারী যারা আছে, যারা
যালেম ও সীমালঙ্ঘনকারী তাদেরকে এটি ক্ষতির মুখে ঠেলে দেয়। তারা ক্ষতিগ্রস্ত হয়, ক্রমশঃ দূরে সরে যেতে থাকে, আল্লাহ তা'লার সন্তা
সম্পর্কে আরও বেশি আপত্তি করা আরম্ভ করে, ধর্মের প্রয়োজনীয়তা সম্পর্কে আপত্তি করা আরম্ভ করে। অতএব, আল্লাহর বাণী বা কুরআনই
হোক না কেন তা ততক্ষণ পর্যন্ত কল্যাণকর হয় না যতক্ষণ না তা পবিত্র হৃদয় নিয়ে পাঠের চেষ্টা করা হয়।

এরপর নামাযের গুরুত্ব সম্পর্কে হযরত মুসলেহ মওউদ (রা.) হযরত মসীহ মওউদ (আ.)-এর একটি ঘটনা শোনান। তিনি বলেন,
একবার তিনি (আ.) কোন মামলায় হাজিরার জন্য যান, আর কোর্টে কেস পেশ হতে বিলম্ব হয়ে যায়। ইত্যবসরে নামাযের সময় হয়ে যায়।
মানুষের নিষেধাজ্ঞা স্বত্ত্বেও তিনি নামায পড়তে চলে যান। যাওয়ার পরপরই কোর্টে হাজিরার জন্য তাঁকে ডাকা হয় কিন্তু তিনি ইবাদতে রত
ছিলেন। ইবাদত শেষ হওয়ার পর তিনি আদালত কক্ষে আসেন। সরকারী বা আদালতের রীতি অনুসারে তাঁর বিরুদ্ধে ম্যাজিস্ট্রেটের এক তরফা
ডিক্রি জারী করার কথা কিন্তু তাঁর এই কাজ আল্লাহ তা'লার দৃষ্টিতে খুবই পছন্দনীয় ছিল। তিনি ম্যাজিস্ট্রেটের মনোযোগ এদিকে আকর্ষণ করেন
যে, ইনি ইবাদত করছেন, নামায পড়ছেন। তিনি তাঁর অনুপস্থিতিতে আমলে না নিয়ে তাঁর পক্ষে বা তাঁর পিতার পক্ষে রায় প্রদান করেন। তাঁর
নিজের ব্যক্তিগত কোন মামলা-মোকদ্দমা ছিল না, সম্পত্তির মামলায় বাধ্য হয়ে যেতে হলেও পিতার পিড়াপিড়িতেই তিনি যেতেন।

অপর এক জায়গায় পুনরায় বা-জামা'ত নামাযের গুরুত্ব এবং হযরত মসীহ মওউদ (আ.)-এর রীতি সম্পর্কে হযরত মুসলেহ মওউদ
(রা.) আমাদের কীভাবে বা-জামা'ত নামাযের অভ্যাস করা উচিত সে সম্পর্কে বলেন, বা-জামা'ত নামাযের আরো একটি রীতি হলো, স্ত্রী-
সন্তানদের সাথে নিয়ে বা-জামা'ত নামায পড়া। অভ্যাস না থাকার কারণে বা-জামা'ত নামাযের গুরুত্ব মানুষের হৃদয় থেকে হারিয়ে গেছে।

যেহেতু বা-জামা'ত নামাযের অভ্যাস নেই তাই ধারণাই নেই যে, জামাতবদ্ধ হয়ে নামায পড়ার গুরুত্ব কত অপরিসীম। এই অভ্যাস পরিত্যাগ করে অর্থাৎ একা নামায পড়ার অভ্যাস ছেড়ে দিয়ে বা-জামা'ত বা জামাতবদ্ধভাবে নামায পড়ার অভ্যাস করা উচিত। হযরত মসীহ মওউদ (আ.) যখন নামাযের জন্য মসজিদে যেতে পারতেন না তখন ঘরেই বা-জামা'ত নামায পড়াতেন। কোন বাধ্য-বাধকতার বশবর্তী হয়ে তিনি পৃথক বা একা নামায খুব বিরলই পড়তেন। প্রায়সময় আমাদের মাকে সাথে নিয়ে তিনি জামা'ত করাতেন বা জামা'তে নামায পড়াতেন। আমাদের সাথে অন্যান্য মহিলারাও যোগ দিতেন। তাই প্রধানত বন্ধুদের সর্বত্র জামা'তের সাথে বা জামাতবদ্ধভাবে নামায পড়া উচিত। যার এই সুযোগ নেই তার উচিত নিজের সন্তান-সন্ততিদের সাথে নিয়ে বা-জামা'ত নামায পড়া। সর্বত্র বন্ধুদের বা-জামা'ত নামাযের ব্যবস্থা নেয়া উচিত। যেখানে শহর বড়, মানুষের বসবাস দূরে-দূরে সেখানে পাড়ায়-পাড়ায় বা-জামা'ত নামাযের ব্যবস্থা করা উচিত। যেখানে মসজিদ নেই সেখানে মসজিদ নির্মাণের চেষ্টা করা উচিত। যাহোক, বা-জামা'ত নামাযের গুরুত্ব হলো, যদি ঘরেও থাকেন সন্তান-সন্ততিকে সাথে নিয়ে নামায পড়বেন যেন বাচ্চাদের মাঝে বা-জামা'ত নামায সম্পর্কে সচেতনতা গড়ে উঠে। এরপর হযরত মসীহ মওউদ (আ.) এই কথার ওপর জোর ত্যাগ দিয়েছেন যে, 'নামায' এর সকল শর্তের নিরিখে পড়া উচিত। হযরত মুসলেহ মওউদ (রা.) এ সম্পর্কে বলেন, সকল শর্তাবলী বা নিয়ম-কানুন সামনে রেখে নামায পড়া খুবই আকর্ষণীয় একটি কাজ। কিন্তু এটি যদি সাজিয়ে-গুছিয়ে পড়া না হয় তাহলে এটি বৃথা কাজে পর্যবসিত হয়। আর এমন নামায কখনও কল্যাণকর হতে পারে না। হযরত মসীহ মওউদ (আ.) বলতেন, মোরগ যেভাবে ঠোঁকর মেরে মাটি থেকে শস্যদানা সংগ্রহ করে মানুষ সেভাবে নামায পড়ে। এমন নামায অবশ্যই কোন কল্যাণ বয়ে আনতে পারে না বরং অনেক সময় তা অভিশাপ ডেকে আনে।

একবার কেউ হযরত মুসলেহ মওউদ (রা.)-এর কাছে অভিযোগ করে যে, আমাদের অধীনস্তরা আমাদেরকে সালাম করে না বা ছোটরা জ্যেষ্ঠদের সালাম করে না। তিনি উপদেশ দিতে গিয়ে বলেন, সালামের নির্দেশ উভয়ের জন্য সমান।

আমাদের সকল কর্মকর্তার তা সে যে পর্যায়েই হোক না কেন, প্রথমে সালাম করে দৃষ্টান্ত স্থাপন করা উচিত। ছোট বা অধীনস্ত আমাকে প্রথমে সালাম করুক- এ অপেক্ষায় থাকা উচিত নয়। অনেক জ্যেষ্ঠ বা ওহদাদার তথা পদাধীকারী এমন আছে যারা খুব কমই সালামের উত্তর দিয়ে থাকে। আমার কাছে এমন অভিযোগও আসে। কর্মকর্তাদের যদি অভিযোগ থেকে থাকে তাহলে অধীনস্তদেরও অভিযোগ রয়েছে, এরা সালামের উত্তর দেয় না। বা এত ক্ষীণস্বরে উত্তর দেয় যে, বোঝা-ই যায় না। বা এমন অবজ্ঞার সাথে উত্তর দেয় যে, মনে হয় তাদের ঘাড়ে কোন বোঝা চাপানো হয়েছে। যাহোক, জামা'তের সকল শ্রেণীর মাঝে সালামের প্রচলন হওয়া উচিত আর এটি হাদীসও বটে।

একটি মোকদ্দমায় ম্যাজিস্ট্রেটের দৃঢ় সংকল্প ছিল বরং তার কাছ থেকে এই অঙ্গীকার নেয়া হয়েছিল যে, মসীহ মওউদ (আ.)-কে অবশ্যই শাস্তি দিতে হবে। এ ঘটনার উল্লেখ করতে গিয়ে হযরত মুসলেহ মওউদ (রা.) প্রথমে অবতরণিকা হিসেবে কিছু কথা বলার পর এক জায়গায় বলেন, এই বৈঠকে উপস্থিত ছিলেন এমন এক বন্ধু আমাকে শুনিয়েছেন, খাজা কামাল উদ্দিন সাহেব এবং আরো কয়েকজন আহমদী ভীত-ত্রস্ত ও হস্ত-দস্ত হয়ে তিনি (আ.)-এর কাছে আসেন এবং বলেন, অমুক ম্যাজিস্ট্রেট যার আদালতে মামলা রয়েছে, সে লাহোর গিয়েছিল। আর্যরা তার ওপর চাপ প্রয়োগ করে, মিথ্যা সাহেব আমাদের ধর্মের চরম বিরোধী। একদিনের জন্য হলেও তাঁকে অবশ্যই শাস্তি দাও; এটি তোমার জাতিগত খিদমত বা সেবা হবে। আর সে তাদের সাথে এই অঙ্গীকার করেছে যে, আমি অবশ্যই শাস্তি দিব। হযরত মসীহ মওউদ (আ.) একথা শোনার সময় শায়িত ছিলেন। শোনার পর একপাশে কনুইয়ের ওপর ভর দিয়ে বলেন, খাজা সাহেব! এ আপনি কেমন কথা বলছেন? কেউ খোদার সিংহের গায়ে হাত দিতে পারে কি? আল্লাহ তা'লা এই ম্যাজিস্ট্রেটকে যে শাস্তি দিয়েছেন তাহলো, প্রথমে গুরুদাসপুর থেকে তার বদলি হয়ে যায়, এরপর তার ডিমোশন বা অবনতি হয়। তাকে ই.এস.ই থেকে মুনসেফ বানিয়ে দেয়া হয়। তারপর (এই মামলার) রায়ও প্রদান করেছে আরেকজন মুনসেফ। তাই ঈমানী শক্তি অসাধারণ এক শক্তি কেউ এর সামনে দাঁড়াতে পারে না।

তাই জামাতে যোগদানকারীদের মাঝে যদি ঈমান ও নিষ্ঠা সৃষ্টি হয় তবে নতুন লোকদের যোগ দেওয়া কল্যাণকর হতে পারে। শুধু সংখ্যা বৃদ্ধি আনন্দের কারণ হওয়া উচিত নয়। যদি কারো ঘরে দশ সের দুধ থাকে আর সে এর সাথে দশ সের পানি যোগ করে, তাহলে এ ভেবে আনন্দিত হতে পারে না যে, তার দুধ এখন বিশ সের হয়ে গেছে। দুধ বৃদ্ধি করাই আনন্দের বিষয় হতে পারে। দুধের ভেতর দুধ ঢেলে বৃদ্ধি করার মাঝেই কল্যাণ নিহিত। তাই নতুন হোক বা পুরাতন আমাদেরকে ঈমানের ক্ষেত্রে উন্নতি করার চেষ্টা করা উচিত। হযরত মুসলেহ মওউদ (রা.) বলেন, হযরত মসীহ মওউদ (আ.) একটি ঘটনা শোনাতেন। একবার রুস্তমের ঘরে চোর ঢুকে। রুস্তম নিঃসন্দেহে অনেক বড় বীর ছিল, কিন্তু তার খ্যাতি ছিল যুদ্ধ কৌশলের জন্য। যুদ্ধে পারদর্শী ছিল, তরবারি চালানোর দক্ষতা ছিল তার কিন্তু যে যুদ্ধে পারদর্শী সে মল্লযুদ্ধেও দক্ষ হবে এমনটি আবশ্যিক নয়। যাহোক, চোর আসলে সে চোর ধরার চেষ্টা করে। সেই চোর মল্লযুদ্ধ বা কুস্তী জানত। সে রুস্তমকে ধরাশায়ী করে। রুস্তম যখন দেখল, আমি এখন মারা পড়বো তখন সে বলে উঠল, রুস্তম এসে গেছে। চোর একথা শুনেই তৎক্ষণাৎ তাকে ছেড়ে পালিয়ে যায়। বস্তুতঃ চোর রুস্তমের সাথেই কুস্তি লড়ছিল এবং তাকে ধরাশায়ীও করে ফেলেছিল কিন্তু রুস্তমের নাম শুনে সে সেখান থেকে পালিয়ে যায়। এ দৃষ্টিকোন থেকে তিনি নসীহত করেন যে, অনেক সময় অনেকে এমন গুজব ছড়ায় যারফলে মানুষের মনোবল ভেঙ্গে যায়। তিনি আরো বলেন, যুদ্ধের পরিস্থিতিতে বোমাবর্ষণের গুজব যতটা ত্রাস সৃষ্টি করে সত্যিকার বোমাবর্ষণ ততটা ভীতি সৃষ্টি করে না। ভিত্তিহীন গুজব অনেক সময় জাতির হৃদয়ে ভীষণতা সৃষ্টি করে। তাই নিজেদের বীরত্ব এবং সাহসিকতা ধরে রাখার জন্য অত্যন্ত গুরুত্বপূর্ণ বিষয় হলো, গুজব ছড়াতে না দেওয়া এবং এর মোকাবিলা করা।

করমদীন সংক্রান্ত মোকদ্দমা সম্পর্কে হযরত মুসলেহ মওউদ (রা.) বলেন, ১৯০২ সনের শেষের দিকে করমদীন নামক এক ব্যক্তি হযরত মসীহ মওউদ (আ.)-এর বিরুদ্ধে মানহানীর মামলা করে আর জেহলামের আদালতে হাজিরা দেয়ার জন্য হযরত মসীহ মওউদ (আ.)-এর

বিরুদ্ধে সমন জারী করা হয়। তিনি ১৯০২ সনের জানুয়ারী মাসে সেখানে যান। তার ধারাবাহিক সফলতার এটি প্রথম নিদর্শন ছিল। যদিও তিনি ফৌজদারী মামলার উত্তর দেয়ার জন্য যাচ্ছিলেন কিন্তু তা স্বত্বেও মানুষের ভিড় ছিল কল্লনাতিত। শহরবাসী ছাড়াও সহস্র সহস্র মানুষ গ্রাম থেকেও তাঁর দর্শন লাভের জন্য এসেছিল। প্রায় একহাজার মানুষ সেখানে বয়আত করেন। তিনি যখন আদালতে হাজিরা দিতে যান তখন এতবেশি মানুষ মামলার কার্যক্রম শোনার জন্য উপস্থিত ছিল যে, আদালতের জন্য ব্যবস্থা করা কঠিন হয়ে পড়ে। মাঠে বহুদূর পর্যন্ত মানুষের উপস্থিতি ছিল লক্ষ্যণীয়। প্রথম হাজিরাতেই তিনি নির্দোষ খালাশ পেয়ে যান এবং তিনি মঙ্গলজনকভাবে ফিরে আসেন।

যাহোক, এরপর যেমনটি তিনি উল্লেখ করেছেন, সংখ্যা বৃদ্ধি পাওয়া আরম্ভ হয়। ১৯০৩ সন থেকে তাঁর বা জামাতের আশ্চর্যজনকভাবে উন্নতি হতে থাকে। অনেক সময় এক দিনেই পাঁচশ'য়ের মত মানুষ বয়আতের চিঠি প্রেরণ করত। তাঁর অনুসারীরা সংখ্যায় সহস্র সহস্র বরং কয়েক লক্ষে উপনীত হয়। সকল শ্রেণীর মানুষ তাঁর হাতে বয়আত করে আর এই জামাত ব্যাপকভাবে বিস্তার লাভ করতে থাকে। তাঁর জীবদ্দশায় পাঞ্জাবের সীমানা পেরিয়ে অন্যান্য প্রদেশে বরং বহির্দেশেও জামাত বিস্তৃতি লাভ করতে থাকে।

আল্লাহ তা'লা অবমাননা এবং অসম্মানের শাস্তি কীভাবে দেন একবার হযরত মসীহ মওউদ (আ.) দিল্লী গমন করেন। সেখানে আমাদের এক আত্মীয়-সম্পর্কের মামা ছিলেন যার নাম মির্যা হায়রাত দেহলবী। তার মাথায় একদিন দুষ্টুমি খেলে। সে নকল পুলিশ ইন্সপেক্টর সেজে হযরত মসীহ মওউদ (আ.)-কে ভয় দেখানোর জন্য বলে, আমি পুলিশ ইন্সপেক্টর, আমাকে সরকারের পক্ষ থেকে পাঠানো হয়েছে আপনাকে এই নোটিশ দেয়ার জন্য যে, আপনি এফুনি এই স্থান ত্যাগ করুন নতুবা আপনার ক্ষতি হবে। হযরত মসীহ মওউদ (আ.) তার প্রতি কর্ণপাত-ই করেননি। কিন্তু কতিপয় বন্ধু তদন্ত করে দেখতে চান যে, এ ব্যক্তি কে? তখন সে সেখান থেকে পালিয়ে যায়। এই ঘটনাটি সীমান্ত প্রদেশের এই অ-আহমদী মৌলভী আব্দুল করীম সরহদী এভাবে বর্ণনা করেছে যে, দেখ আল্লাহর নবী সাজে। সে দিল্লী গিয়েছিল আর মির্যা হায়রাত পুলিশের ইন্সপেক্টর সেজে তার কাছে চলে যায়। তখন সে এতটাই ভয় পায় যে, সিড়ি থেকে নামার সময় তার পা পিছলে যায় এবং সে হুমড়ি খেয়ে নীচে পড়ে যায়। মানুষ এ বক্তৃতা শুনে গলা ফাটিয়ে অউহাসি হাসে। কিন্তু ঘটনা কী ঘটেছে এরপর, আল্লাহ তা'লা কীভাবে শাস্তি দেন তা দেখুন! একই রাতে মৌলভী আব্দুল করীমকে আল্লাহ তা'লা ধৃত করেন। সে ঘরের ছাদে ঘুমন্ত ছিল। রাতে কোন কাজের জন্য তাকে উঠতে হয়। সেই ছাদের যেহেতু কোন রেলিং ছিল না বা কিনারায় ইটের কোন দেয়াল ছিল না আর ঘুমের কারণে তার চোখ বন্ধ ছিল তাই তার এক পা ছাদ থেকে ফসকে যায় আর সে ধড়াস করে নীচে পড়ে যায় এবং অকুস্থলেই পটল তুলে।

যাহোক, এ থেকে তার পরিণাম যারা দেখেছে তাদের সামনে স্পষ্ট হয়ে গেছে যে, আল্লাহর নবীদের সাথে তিরস্কারের পরিণাম কী হয়ে থাকে। আজকাল যারা মহানবী হযরত মুহাম্মদ (সা.)-এর প্রতি বিদ্বেষাত্মক আচরণ করে বা অপলাপ করে (তাদের জানা উচিত) তিনি (সা.) ছিলেন খোদা তা'লার সবচেয়ে প্রিয় নবী। তাঁর সম্পর্কে মানুষের অপলাপকে আল্লাহ তা'লা এমনতেই ছেড়ে দেবেন? না বরং আল্লাহ তা'লা এমন মানুষকে পৃথিবীতেও শিক্ষণীয় নিদর্শনে পরিণত করেন। তিনি বলেন, অনেকে এমন ছিল যারা বলত মির্যা সাহেব কুষ্ঠ রোগে আক্রান্ত হবেন। আল্লাহ তা'লা তাদেরকেই কুষ্ঠ রোগে আক্রান্ত করেছেন। অনেকে বলত, মির্যা সাহেব প্লেগের শিকার হবেন; যারা এমনটি বলেছে আল্লাহ তা'লা তাদেরকেই প্লেগের মাধ্যমে ধ্বংস করেছেন। যেখানে এ ধরনের সহস্র সহস্র দৃষ্টান্ত রয়েছে সেখানে আমরা আর কতকাল এগুলোকে দৈব ঘটনা আখ্যায়িত করব। তাই নিজেদের জীবনে এমন পবিত্র পরিবর্তন আনয়ন কর যেন পৃথিবী তা অনুভব করে। তোমাদের অবস্থা এমন হওয়া উচিত, তোমাদের তাকওয়া, তোমাদের পবিত্রতা, তোমাদের দোয়া গৃহীত হওয়া, তোমাদের আল্লাহর সাথে সম্পর্ক দেখে যেন মানুষ এদিকে চুম্বক-আকর্ষণ বোধ করে। স্মরণ রেখ, আহমদীয়াতের উন্নতি এমন মানুষের মাধ্যমেই হবে। আর আপনারা যদি এই মর্যাদায় বা এর কাছাকাছি পৌঁছে যান তাহলে আপনারা বাইরেও যদি না আসেন এবং কোন নিভৃত কোনে বসে থাকেন তাহলে সেখানেও ইনশাআল্লাহ মানুষ আপনারদের চতুর্পার্শ্বে সমবেত হবে আর আহমদীয়াত গ্রহণ করবে।

আরো একটি ঘটনার তিনি উল্লেখ করেন। হযরত মসীহ মওউদ (আ.) যখন শিয়ালকোট যান মৌলভীরা সেখানে ফতওয়া জারি করে, যে এই ব্যক্তির বক্তৃতা শুনে যাবে তার বিবি তালুক হয়ে যাবে বা বিয়ে ভেঙ্গে যাবে। কিন্তু মির্যা সাহেবের আকর্ষণ এমন দুর্বীর ছিল যে, মানুষ এই ফতওয়ার প্রতি দৃষ্টিপাত করেনি। হযরত মুসলেহ মওউদ (রা.) বলেন, একজন বিটি সাহেব ছিলেন, তিনি তখন শিয়ালকোটের সিটি ইন্সপেক্টর ছিলেন। তিনি বলেন, মানুষ যখন অনেক হৈচৈ করে এবং বিশৃঙ্খলা সৃষ্টি করার চেষ্টা করে তখন এই বিটি সাহেব বা পুলিশ ইন্সপেক্টরও যেহেতু মসীহ মওউদ (আ.)-এর বক্তৃতা শুনেছিলেন। তিনি আশ্চর্য হন, তিনি (রা.) বলেন, এই ব্যক্তি যদিও সরকারী কর্মকর্তা ছিলেন, কিন্তু তিনি জলসাস্থলে দাঁড়িয়ে যান এবং বলেন, ইনিতো (মির্যা সাহেব) বলছেন, খ্রিষ্টানদের খোদা মারা গেছেন, হে মুসলমানগণ! একথা শুনে তোমরা কেন রাগ করছো?

হযরত মৌলভী বোরহান উদ্দীন সাহেব নামে হযরত মসীহ মওউদ (আ.)-এর একজন অত্যন্ত নিষ্ঠাবান সাহাবী ছিলেন। তার সম্পর্কে তিনি (রা.) বলেন, আহমদীয়াত গ্রহণের পূর্বে তিনি ওহাবীদের প্রসিদ্ধ আলেম ছিলেন। তাদের মাঝে তিনি বড়ই সম্মানিত ব্যক্তি ছিলেন। হযরত মসীহ মওউদ (আ.) যখন শিয়ালকোট যান সেখানে তার চরম বিরোধিতা হয়। এরপর তিনি ফিরে এলে বিরোধীরা যার সম্পর্কে জানতে পেরেছে যে, এ ব্যক্তি আহমদী তাকে তারা ভয়াবহ কষ্ট দেয়া আরম্ভ করে। মৌলভী বোরহান উদ্দীন সাহেবও হযরত মসীহ মওউদ (আ.)-কে ট্রেনে তুলে দিয়ে স্টেশন থেকে ফেরত যাচ্ছিলেন। মানুষ গোবর উঠিয়ে তার ওপর ছুড়তে থাকে। এমনকি এক ব্যক্তি তাঁর মুখে গোবর ঢুকিয়ে দেয়। তিনি স্বানন্দে এই কষ্ট সহ্য করতে থাকেন। যখনই তাঁকে লক্ষ্য করে গোবর ছোড়া হত তিনি আনন্দের সাথে বলতেন, এই দিন আর এই সৌভাগ্য এত সহজে ভাগ্যে জোটে না। তিনি প্রথমদিকে যখন হযরত মসীহ মওউদ (আ.)-এর কথা শোনেন, পদব্রজে কাদিয়ান আসেন। হযরত মসীহ

মওউদ (আ.)-এর রীতি ছিল, যখন তিনি কোন বই, বিজ্ঞাপন বা প্রবন্ধ লিখতেন প্রায় সময় হাটতে হাটতে লিখতেন এবং ক্ষীণ স্বরে ধীরে ধীরে তা পাঠও করতেন। তখনও হযরত মসীহ মওউদ (আ.) কোন প্রবন্ধ লিখছিলেন আর খুব দ্রুত হাটছিলেন এবং সঙ্গে-সঙ্গে তা পাঠও করছিলেন। দেয়ালের কাছে পৌঁছে হযরত মসীহ মওউদ (আ.) যখন ফিরতে যাচ্ছিলেন, মৌলভী বোরহান উদ্দীন সাহেব বলেন, আমি সেখান থেকে দ্রুত এই আশংকায় ফিরে আসি- পাছে তিনি আমাকে দেখে না ফেলেন। হযরত হাফিয হামেদ আলী সাহেব বা অন্য কেউ জিজ্ঞেস করেন, কি হয়েছে? মসীহ মওউদ (আ.)-এর যিয়ারত করেছেন কি? তিনি বলেন, আমি বুঝে গেছি। পাঞ্জাবীতে বলেন, যে ব্যক্তি ঘরের মধ্যেই এত দ্রুত হাটে তাঁকে কোন সুদূরের গন্তব্যেই পৌঁছতে হবে অর্থাৎ যে কামরায় এত দ্রুত হাটে, মনে হয় যেন তাঁর গন্তব্য অনেক দূরে। তখনই তার হৃদয়ে একথা বদ্ধমূল হয়ে যায় যে, ইনি পৃথিবীতে কোন মহান কাজ করবেন। তিনি অত্যন্ত নিবেদিতপ্রাণ এক আহমদী ছিলেন। আহমদীয়াত গ্রহণের কারণ হিসেবে এক অদ্ভুত ঘটনা তিনি শোনাতেন।

হযরত মুসলেহ মওউদ (রা.) বলেন, এটি একটি নিগূঢ় তত্ত্ব, একটি গূঢ় কথা কিন্তু শুধু তার পক্ষেই দেখা সম্ভব যার আধ্যাত্মিক দৃষ্টি রয়েছে। তিনি হযরত মসীহ মওউদ (আ.)-এর সাথে কোন কথা না বলেই সেদিন ফিরে যান। কিন্তু তার হৃদয়ে যেহেতু এই কথা বদ্ধমূল হয়ে যায় তাই হযরত মসীহ মওউদ (আ.) যখন দাবী করেন তখন আল্লাহ তা'লা তাকে আহমদীয়াত গ্রহণের তৌফিক দেন। এরপর এতটা নিষ্ঠা এবং আন্তরিকতায় তাকে সম্মান করেন যে, কোন বিরোধিতার প্রতি তিনি দ্রুত-ই করেন নি।

হযরত মুসলেহ মওউদ (রা.) বলেন, দ্রুত কাজ করলে সময়ের সাশ্রয় হয়। তিনি বলেন, তাই সন্তানদের দ্রুত কাজ করার এবং দ্রুত চিন্তা করতে অভ্যস্ত করা উচিত। কিন্তু দ্রুত বলতে তড়িঘড়ি বা তাড়াহুড়া করে কাজ করা নয় বরং চিন্তা-ভাবনা করে তাড়াহুড়া কাজ করা। শয়তানই তুরাপরায়ণ হয়ে থাকে। কিন্তু ভেবেচিন্তে তাড়াহুড়া যে কাজ করে সে আল্লাহ তা'লার সিপাহী বা সৈন্য হয়ে থাকে। অনেকের মাঝে এই আলস্য দানা বাঁধে যে, এখন আরাম করি পরে কাজ সেবে নেব। এমনটি করলে কাজ সবসময় বিলম্বিত হয়। তাই শুধু ছোটদেরই বিষয় নয়, যারা বয়স্ক, যারা ওহদাদার বা পদাধিকারী তাদেরও কাজে গতি সঞ্চালন করা উচিত কেননা, আমরা সেই মসীহর অনুসারী যিনি সময়ের সদ্ব্যবহার করেছেন গভীর মূল্যায়নের চেতনা নিয়ে বরং আল্লাহ তা'লা তাঁকে ইলহামে জানিয়েছেন, তাঁর সময় নষ্ট করা হবে না। তাই আমাদের এদিকে দৃষ্টি রাখা উচিত। এরপর হযরত মসীহ মওউদ (আ.) সম্পর্কে তিনি (রা.) বলেন, হযরত মসীহ মওউদ (আ.)-কে আমি দেখেছি, তিনি সারাদিন ঘরে কাজ করতেন কিন্তু দৈনিক একবার অবশ্যই পদভ্রমণে বের হতেন। কাজ বলতে তার রচনা, বক্তৃতা, সাক্ষাত সবই বুঝায় কিন্তু ভ্রমণের জন্য অবশ্যই বের হতেন। আজ আমাদের দ্বারা তা সম্ভব হয় না। আমরা অনেক সময় ভ্রমণে যেতে পারি না। কিন্তু হযরত মসীহ মওউদ (আ.) অবশ্যই পদভ্রমণে বের হতেন। তাই আজকাল খোলা মাঠে, উন্মুক্ত বাতাসে খেলাধুলা করার প্রতি শিশু-কিশোর ও যুবকদের বিশেষভাবে মনোযোগ দেয়া উচিত এবং বিশেষভাবে মনোযোগ আকর্ষণেরও প্রয়োজন রয়েছে। আর বিশেষভাবে জামেয়ার ছাত্রদের জন্য অন্ততঃপক্ষে দৈনিক দেড় ঘন্টা বাইরে খেলাধুলা করা আবশ্যিক জ্ঞান করা উচিত। আজকাল টেলিভিশনের সাথে সম্পর্কযুক্ত খেলাধুলা বাইরের শরীরচর্চা সম্পূর্ণরূপে বন্ধ করে দিয়েছে। যদি কোন বাধ্য-বাধকতা না থাকে তাহলে ভ্রমণ এবং খেলাধুলা আবশ্যিক হওয়া উচিত।

এরপর হুযূর আনোয়ার (আই.) মৌলভী বোরহান উদ্দিন সাহেব (রা.) এর একটি স্বপ্ন ও তার ব্যাখ্যা প্রসঙ্গে হযরত আকদস মসীহ মওউদ (আ.) এর নির্দেশাবলী বর্ণনা করেন এবং বলেন, যে বিষয়কে ইসলাম ঈমান ও আরাম আখ্যায়িত করেছে তা করা আবশ্যিক। আল্লাহ তা'লা সুস্পষ্টভাবে বলেছেন, “ফাইয়া ফারাগ্তা ফানসাব ওয়া ইলা রাব্বিকা ফারগাব”। যখন কাজ থেকে ফারাগ হও আরও বেশি পরিশ্রম কর এবং তোমার প্রভুর পানে ধাবিত হও। এটি একটি গূঢ় কথা যা সব সময় স্মরণ রাখা উচিত। পৃথিবীর মানুষ যাকে আরাম আখ্যায়িত করে সেই অর্থে তোমাদের জন্য কোন আরাম বা বিশ্রাম নেই কিন্তু কুরআন যেই অর্থে আরাম বা বিশ্রামের প্রতিশ্রুতি দেয় তা সহজেই তোমরা হস্তগত করতে পার। পৃথিবী যে অর্থে আরাম বা বিশ্রামের অর্থ করে তা অবশ্যই ভ্রান্ত। আর এই অর্থে যে ব্যক্তি আরাম বা বিশ্রাম সন্ধান করবে সে এ পৃথিবীতেও অন্ধ থাকবে এবং পরকালেও অন্ধ হিসেবেই উথিত হবে।

তাই মু'মিনের কাজ হলো নিজেকে কাজে নিয়োজিত রাখা। এক লক্ষ্য অর্জনের পর দ্বিতীয় লক্ষ্য সন্ধান সোচ্চার হয়ে যাওয়া। আর এটি-ই ব্যক্তিগত এবং সমষ্টিগত উন্নতির ব্যবস্থাপত্র এবং রহস্য। আল্লাহ তা'লা আমাদেরকে এর তৌফিক দিন। (আমীন)

Khulasa Khutba Juma Huzoor Anwar, Bangla (6th February 2015)

BOOK POST (PRINTED MATTER)

TO

.....
.....

From : Ahmadiyya Muslim Mission, Uttar hajipur, Diamond Harbour, 743331, 24Parganas (s), W.B